


894.342-1  
Б20  
каз. 9

# АХМЕТ БАЙТҮРСЫНОВ



## шығармалары





ҚАЗАҚ ССР ФЫЛЫМ АКАДЕМИЯСЫ М. О. ӘУЕЗОВ  
АТЫНДАҒЫ ӘДЕБИЕТ ЖӘНЕ ӨНЕР ИНСТИТУТЫ

# Ахмет Байтұрсынов



## Шығармалары

ӨЛЕҢДЕР, АУДАРМАЛАР, ЗЕРТТЕУЛЕР

ББК 84 Қаз 7—5  
Б 20

Редакция алқасы:

*Ахметов З., Бердібаев Р., Дәуітов С. (жауапты шығарушы),  
Каратаев М., Кирабаев С., Найманбаев К., Сәтбаева Ш.,  
Тәжібаев Ә., Шәріпов Ә.*

Алғы сөзші жазған Ш. К, Сәтбаева

Редакторы *Мақсұт Неталиев*

Байтұрсынов А.  
Б 20 Шығармалары: Өлеңдер, аудармалар, зерттеулер.  
(Құраст. Шәріпов Ә., Дәуітов С.) — Алматы:  
Жазушы, 1989.— 320 бет., портр., суретті.

Қазақ әдебиеті мен өнершін көрнекті қайраткері Ахмет Байтұрсыновтың бул  
шығармалар жинағына бурын «Маса», «Қырық мысал» кітаптарында жарық көрген  
өлеңдері мен аудармалары және «Әдебиет танытқыш» деп аталатын зерттеу еңбеп  
топтастырылды

Б 4702250201-117  
402(05)-89 бе  
ISBN 5-605-00811-ОГГ";"

## АХМЕТ БАЙТҰРСЫНОВ

(1873—1937)

Қазақстан Компартиясы Орталық Комитетінің «Мағжан Жұмабаевтың, Ахмет Байтұрсыновтың және Жұсіпбек Аймауытовтың творчество-лық мұрасы туралы» қаулысы республиканың рухани өміріндегі үлкен маңызды оқиға болды. Онда: «Жазықсыз жазаға ұшырап, республикада отызыншы жылдары орын алғай зорлық-зомбылықтың, социалистік заң-дышты бұзудың құрбаны болған аса кернекті қазақ ақыны Мағжан Жұмабаевтың, ірі ғалым-лингвист әдебиет зерттеуші, түрколог, дарынды ақын-аудармашы Ахмет Байтұрсыновтың, қазақ романының негізін салушылардың бірі, белгілі лингвист, ақын-аудармашы Жұсіпбек Аймауытовтың творчество-лық мұрасын зерттеген кюмиссияның жұмыс қорытындыларын қарай келіп, Қазақстан Компартиясы Орталық Комитетінің Бюросы комиссияның М. Жұмабаевтың, А. Байтұрсыновтың және Ж. Аймауытовтың қоғамдық-саяси, ғылыми-педагогикалық және әдеби қызметі туралы тарихи шындықты толық көлемінде қалпына келтіру, олардың жеке шығармаларын баспасөзде көрсетілген қателіктері мен уақытша адасуларын сын түрғыдан зерделеу жөніндегі тұжырымдарымен келісті...» дедінген. Сонымен бірге қаулыда олардың өмірі мен творчество-лық қызметі туралы мақалалар сериясын жариялау, тандамалы шығармалары мен ғылыми еңбектерін әзірлеу, басып шығару қажеттілігі атап көрсетілген.

XIX ғасырдың соңғы кезі мен XX ғасырдың алғашқы отыз жыны ішінде қазақ халқының қоғамдық-саяси, мәдени және әдеби өміріне белсене араласып, өнімді еңбек еткен, артына құнды мұра қалдырған Ахмет Байтұрсынов жоғарыда аталған қайраткерлердің қатарында көп жылдан кейін туған халқымен қайта табысты. Ол Ұлы Октябрь революциясына дейін-ақ үлкен ағартушылық қызметімен бірге, ірі ғалым-лингвист, әдебиет жинаушысы — зерттеуші, түрколог, бірқатар оқулық пен оқу құралдарының авторы, дарынды ақын-аудармашы ретінде кеңінен танылған еді. Оның өмірі мен қоғамдық, творчество-лық қызметінде Октябрь революциясы алдында қалыптасқан қазақ интеллигенция өкілдерінің тынымсыз тынысы, әр саладағы рухани ізденістері, олардың бағыт-бағдары мен сәтті-сәтсіз нәтижелері, жеке өмірінің трагедиялық жағдайлары бой көрсетті.

Ахмет Байтұрсынов 1873 жылдың 25 январында Торғай уезінің Тосын бولысында қарапайым шаруа семьясында туған. Ахметтің әкесі Байтұрсын Шошакұлы еті тірі, намысшыл, батыл, сергек адам болса керек, ейткені ол езін қолдаушылармен бірге XIX ғасырдың 80-жылдары сол ауыл-аймақты басқарып жүрген Яковлев деген уездік бастықты сабап, оның семьясын, туған-туысқандарын, сыйбайластарын құышты. Бұдан соң уезд басшылары ауылға жазалаушы отряд жіберіп, ағалы-інілі Байтұрсын мен Ақтасты тұтқындайды. Қазан округтік сотының жылжымалы сессия-

сы Шошаковтарды 15 жылға Сібірге жер аударуға шешім қабылдайды. Бұл сүмдүк оқиғалар кезінде Ахмет он жаста екен. Бұлар баланың жастық сезіміне айрықша әсер еткен. Адамдар арасындағы мұндай қақтығыстардың, шиеленістердің әлеуметтік астарларын, толық түсініп болмаса да, қайсар әке Байтұрсын мен оның туысы Ақтастың және оларды жақтаушылардың әрекеттері жас Ахметтің қаналған халықтың ауыр түрмисын тануына, олардың ағаттығы жолындағы ізденістеріне ой салғаны көрінеді. Ақынның «Анама хат» өлеңіндегі мына бір жолдар жас кезінде көрген, түсінген сүмдүк оқиғалар әсерінен жазылса керек.

...Оқ тиіп он үшімде ой түсіріп,  
Бітпеген жүрегімде бар бір жарам.  
Алданыш тамағыма, оны ұмытсам,  
Болғандай жегенімнің бәрі харам.  
Адамнан туып, адам ісін етпей,  
Үялмай не бетіммен көрге барам?!

Бұл өлең 1909 жылы ол Семей түрмесінде жаткында жазылған сияқты. Ақын аяулы анасына деген сағыннышын:

...Кетер деп «суға құлап, отқа түсіп»,  
Қайғы жеп, менің үшін болма алаң! —

деген жолдармен білдіреді.

...Қаңбақ пен салмағың тен бұл бір заман  
Лаж жоқ жел айдаса ермесіне.  
Тайпалған талай жорға, талай тұлпар,  
Тағдырдың кез болып тұр кермесіне.  
Солардан жаңым-тәнім ардақты емес,  
Орынсыз қүйзелейін мен несіне?! —

деген жолдарда да сол уақыттың күрделілігі, жазықсыз жапа шеккен саңдақтардың тынысы, сенімі сезіледі.

Әділетсіздік құрбаны болған ағалы-інілі Байтұрсын мен Ақтастың балалары енді Шошактың кеңжесі Ерғазышың тәрбиесінде болады, оның көмегімен 1891 жылы Торғайдағы екі кластық орыс-қазақ училищесінде оқиды. Кейін Ахмет Орынборға барып мұғалімдер мектебіне түсіп, оны 1895 жылы бітіреді. Бұл жылдары Торғай, Орынбор өлкесінде ұлы педагог әрі жазушы Ұбырай Алтынсарин негізін қалап кеткен иті дәстүрлері бар мектептер жұмыс істегені белгілі. Осы үлгідегі мектептерде оқып, жүйелі білім, тәрбие алған Ахмет 1896-1907 жылдары Ақтөбе, Қостанай және Қарқаралы уездеріндегі ауылдық және болыстық мектептерде екі кластық училишелерде мұғалім болып қызмет атқарадық Сейтіп, ол сол кездегі қазақ қоғамына ең бір қажет және кең шёнберде дамуға бет алған ағартушылық, демократтық қозғалысқа белсене араласады. Ол орыс-қазақ мектептерінде, семинарияларда педагог бола жүріп, қоғамдық әлеуметтік емірге үнілді, айналаға білім-ғылым таратудың тиімді жолдарын қарастырды, қазақ тілі және әдебиетінің тарихымен, теориясымен шұғылданды, алғашқы окульықтар мен оку құралдарын жазып, халықтың көркем сөз

мұрасын жинау, жүйелеу, зерттеу ісіне араласты, баспасөзге мақалалар жазды, өлең шығарды, аударма жасады. ^.

**A** Карқаралыда мұғалім болып жүргенде әділетсіздікке, патша екіметінің саясатына қарсы наразылық білдірушілер катарында болғаны үшін Ахмет Байтұрсынов бақылауға алынады да, 1909 жылы июльде Семей түрмесіне қамалады. Кейін оны қазақ жерінен тыскары жерлерге жер аударуға үкім шығарылып, 1910 жылдың мартынан 1917 жылдың соңы айларына дейін Орынбор қаласында тұрады. Бірақ ол бұл кезеңде де өзінің қоғамдық-саяси, мәдени және әдеби өмірге араласуын тоқтатпайды. 1911 жылы Орынборда оның «Маса» атты өлеңдер және аударма мысалдар жинағы басылады. 1913 жылдың мартынан бастап «Қазақ» атты апталық газет үйымдастырып, 1917 жылдың сентябріне дейін оның редакторы болып істейді.

«Қазақ» газеті бетінде қазақ халқының қоғамдық және мәдени мұдде-қажеттіктерін батыл сөз еткен материалдар жиі басылған. Соңдықтан да ол өз дәуірінің беделді органы саналған. Алғашқы шыққан жылдың сонында-ақ оның 3000-нан астам жаздырып алушысы болған, ал жабылар алдында өзінің баспаханасы, кітапханасы жұмыс істеген және тиражы 8 мыңға жеткен.

«Қазақ» газеті соңғы кезге дейін көртартпа ұлтшыл-буржуазиялық басылым ретінде сипатталынып келді. Мұның сынаржақтылығы қазір белгілі болып отыр.

«Қазақ» газеті бетінде басылған қоғамның әлеуметтік, саяси өміріне қатысты кейбір материалдар, ел билеушілердің озығын, парапорлығын әшкөрелеген мақалалар ресми орындардың наразылығын тудырып, олар газет редакциясын үнемі бақылауға алып, тінтулер жүргізіп отырған. Губернатор мен жандарм бастығы Ахмет Байтұрсыновты бірнеше рет жауапқа тартып, айып салған. Мысалы, «Қазақ» газетінің 1914 жылғы 80-санында Ахмек, Байтұрсынов жазған бас макалада Қазақ аймағын басқару ережелері қатты сыналғаны үшін Орынбор губернаторы Сухомлинов редакторды 1500 сом штраф талеу немесе үш айға тұтқындау туралы шешім қабылдайды. 1500 сом төлеу газет тағдыры үшін ауырлықта түсетін болғандықтан А. Байтұрсынов денсаулығының нашарлығына қарамастан полицияға өзі барып, айып төлеуден бас тарттынын, түрмеде отыруға дайын екендігін айтады<sup>20</sup> 20 октябрьде ол түрмеге алынады. Бұл жағдай туралы хабар тарасымен-ақ газет окушылары ақша жинап, айыпты төлеп, 5 күннен кейін А. Байтұрсыновты түрмeden босатып алады, сейтіп 1916 жылы да газет 3000 сом айып төлеген, солардың бәрін де газеттің окушылары, тілекестері көтерген. Олар Байтұрсыновты тұтқынға алғызт бай, басылымды жаптырмай, аса ізгі мінездер танытқан.

А. Байтұрсынов баскаруымен шығып тұрған «Қазақ» газеті қазақ халқының рухани, мәдени тарихында үлкен орны бар басылым болды. 1923 жылы Мұхтар Әуезов: «...Қазақтың еңкейген көрі, еңбектеген жасына түгелімен ой түсіріп, өлім үйқысынан оятып, жансыз денесіне қан жүгіртіп, күзгі таңын салқын желіндей шырықтырған, етек-жецін жиғызған

«Қазақ» газеті болатын. Ол газетінің жаны кім еді? Ішіндегі қажымайтын қайрат, кемімейтін екпін кімнің екпіні еді? Ол екпін үйықтаған қазакты айқайлап оятуға заман ерік бермеген соң «Маса» болып талай ызындал «оятамын» деп ұзак бейнетті міндет қылыш алған, Ахандың екпіні болатын» — <sup>д</sup>еп жазған-ды.] «Қазақ» газеті 1917 жылдың июль айынан «Алаш» үйымының ресми органына айналды да, көп ұзамай Торғай облыстық Советтері съезінің шешімімен жабылды. 1917—1919 жылдары Ахмет осы ұлтшылдық үйымның басы-қасында болды. Одан өз еркімен 1919 жылдың мартаңда бойын аулақ салып, бұрынғы түсінбеушіліктерінен арылып, еліне адаптация мен мәдениеттегі қызметтерге араласты. 1919 жылдың 4 апрелінде «Известия» газетінде «Алашорданың» бұрынғы басшылығы мен мүшелеріне кешірім жарияланып, олардың совет қызмет орындарында адаптация мен мәдениеттегі қызметтерге араласты.

V 1919 жылдың 24 июнь күні РСФСР Халық Комиссарлар Советі, Қырғыз (Қазақ) өлкесін басқару жөніндегі әскери революциялық комитет құру туралы қаулы қабылдала, оның председателі етіп тәжірибелі қызметкер С. С. Пестковскийді тағайыннады, ревкомның мүшелері болып Сейтқали Менделев, Бақытжан Қаратаев, Ахмет Байтұрсынов, Мұхамедиар Тұнғаншин, В. Л. Лукашев, Эліби Жангелдин бекітілді.

Ревком жұмыстарының барысы, экономикалық және ағарту ісіндегі қыншылыштар туралы мән-жайды хабарлау үшін С. С. Пестковский мен А. Байтұрсынов В. И. Лениннің қабылдауда болған. Олардың хабарларын зейін қоя тындағаннан кейін ұлы көсем оларға қазақ аймағын басқаруға қатысты қаулылар дайындау қажеттігі және оны қазақ тіліне аудару туралы ақыл-кеңес береді. Мұндай маңызды деректер Ахмет Байтұрсыновтың ұлы көсем В. И. Ленинді көрген, жүздескен, ақыл-кеңесін естіп, одан рух алған санаулы қазақ қайраткерлерінің бірі болғанын дәлелдейді.

•Ахмет Байтұрсыновтың өмірі мен қызметінің белгілі бір кезеңіне маңыз беріп, оны өсіріп тұрған бір уақыға оның 1920 жылдың 4 апрелінде РКП(б)-ның Орынбор Комитетіне партия мүшелігіне алушы өтініп берген арызы./Онда былай делінген:

### «РКП(б) ОРЫНБОР КОМИТЕТИНЕ

Ғасырлар бойы езгіде болып келген қырғыз халқын азат етудің жолдарын көп уақыт іздеуден кейін мен мынандай тоқтамға келдім:

1. Азат етілген қырғыз халқы қаналған адамзаттың бүкіл басқа белгімен бірге ғана, яғни дүниежүзілік революция, дүниежүзілік федерация арқасында ғана бақытқа жете алады.

2. Таптар мен ұлттарды іс жүзінде толық азат етуге өзінің алдына тікелей мақсат етіп қойған және оны ішінәра жүзеге асырған интернационалдық Коммунистік партиясынан басқа ешқандай партия мұны жасай алмайды.

3. Шынайы еңбек демократиясына өтер қажетті баспалдақ — пролетариат пен жартылай пролетариаттың толық саяси және экономикалық билігі сипатындағы адамзаттың еңбекші қауымының диктатуrasesы болып табылады.

4. Бұл диктатура егер үйымдасқан адамзаттың, еңбекші қауымының басым көпшілігі оны қолдаған кезде ғана бүкіл адамзаттың мүддесі үшін нығайып, іс жүзіне асырылмақ, сол үшін де қырғыз еңбекші халқын осы программа астына топтастыру қажет.

5. РКП(б)-ның ұлттық қатынастары саласындағы программысы, сондай-ақ Ленин жолдастың ұлтардың өзін-еzi билеу жөніндегі пікір-таластар қорытындысы бойынша баяндалған ұлтардың өзін-еzi билеу жөніндегі көзқарасы және шығыс халықтары арасындағы жұмыстарға байланысты РКП(б) Орталық Комитетінде айтылған тактикалық пайымдаулар дұрыс қолданыштан кезде және дұрыс жүзеге асырылғанда қаналған ұлт ретінде халқының мүдделері қанағат таба алады.

Жоғарыда айтқандарыма байланысты, оның программын жалпы іске асыруға және атап айткендегі шығыс мәселесі бойынша программын жүзеге асыруға көмектесу үшін Россия Коммунистік большевиктер партиясына өтуге шешім қабылдады, ол үшін Комитеттің мені РКП(б) мүшелерінің қатарына алуын өтінемін.

*Ахмет Байтұрсынов.*

4 апрель, 1920 ж.»

Бұл жеке адамның өтініші қатарында қалмай, совет шындығы ықпал еткен сол тәрізді адамдардың саяси санасы қалай биіктегенін аңғартатын документ ретінде сол кездегі Қырғыз (Қазақ) автономдық Әскери-революциялық Комитетінің органы болып саналатын «Известияның» 1920 жылғы 16-шы санында жарияланды. Осы санда «Ахмет Байтұрсынов» деген мақала (В. М. — Т. бүркеншікті атпен) басылды. Онда сол кез үшін А. Байтұрсыновтың партияға кіргуте берген арызының маңызы атап көрсетілді.

Алайда, ол Коммунистік партияның биік мақсаттары мен міндеттерін терең түсініп, қызу қызмет ету биігіне көтеріле алмады. Әйткені, 20-жылдардағы қоғамдық, экономикалық, саяси-рухани, мәдени өмірдегі өзекті өзгерістерді түсініп, ерекше екпін, қын қопарылыс бой көтере бастаған, бірақ әлі орнығып, қалыптасып үлгірмеген жаңалықтардың мән-мазмұнын, сыр-қырларын бірден танып, оған ілесу оңай да емес-ті.

А. Байтұрсыновпен заманы, қызметі қатарлас болған революцияшыл ақын С. Сейфуллин оның туғанына 50 жыл толуына байланысты «Еңбекші қазақ» газетінде мақала жариялады, онда: «...Озі үшін ұлтшыл болған кулардан бөлініп, Ахмет сол ұлт қамы үшін Коммунист партиясына кірді. Эрине, Ахмет Коммунист партиясында да көп бола алмады. Көп бола алмайтыны белгілі еді. Ахаң байлардың құлдығында шіріген жарлылардың айғайшысы емес, олардың шоқпаршысы емес, бірақ байын, кедейін айырмай, қазакты ғана сүйетін адал жүрек, ұлтжанды еді. Калай болса да

жазушысы аз, әдебиеті нашар қазақ жырларына «Оку һем тіл құралда-рымен» қылған қызметі таудай», — деп жазды. Ол юбилиардің көзқарасындағы кейбір үстірттіктерді, осалдықтарды, қоғамдық күрделі таптық мұдделерді танып, айырудың әлсіздіктерін де ашып айтты.

Қазақ АССР-і құрығаннан кейін А. Байтұрсынов 2 жыл бойы республиканың Халық ағарту комиссары, Бүкілressейлік Орталық Атқару Комитетінің, Қазақ Орталық Атқару Комитетінің мүшесі болыш жұмыс істедді, одан соң Түркістан Компартиясы Орталық Комитетінің газеті «Ақ жолда», Халық ағарту комиссариаты жанындағы Қазақстан академиялық орталығында еңбек етті.

20-жылдардың соңы жалпы ел үшін, оның ішінде Қазақстан үшін аса ауыр болғаны мәлім. Жеке адамға табыну зардалтарының алғашқы нышаны біліне бастаған осы бір тұста ескі интелигенция өкілдері қудалауға түсті. А. Байтұрсынов 1929 жылдың 2 июні күні кзмауға алынып, кейін өзі Архангельск облысына, зайыбы Александра мен қызы Шолпан Томсиге жер аударылды. Бұрынғы әр қылыш қоғамдық қызметі мен ғылыми еңбектері, шығарған өлеңдері, өзіндік ой-пікірлері сынаржақ сынға, дәлелсіз даттауға ұшырады. Одан тек 1934 жылдың ғана қайтып оралды. Оған ұлы жазушы М. Горькийдің әйелі П. Пешкованың Бүкіләлемдік Қызыл Крест ұйымының атына бірсыптыра жазықсыз азап шеккендерге көмектесуін өтініп жазған хаты себеп болды. Алайда, Алматыға келгеннен кейін де оның қалауынша қызмет етуіне шектеушілік қойылды. Көп ұзамай 1936-1937 жылдардың күйіні басталды. А. Байтұрсынов та 1937 жылды 8 октябрьде тұтқындалып, содан қайтып оралмады. Сөйтіп кернекті ғаяым, әдебиетші қасірет кездің құрбаны болыш кете барды. Оның атына, еңбектеріне ұзақ жылдар бойы тығым салынды. Бүгін елімізде іске асып жатқан жаңару, қайта құру, жариялышық заманында ғана А. Байтұрсыновтың аты қайта аталып, оның қоғамдық қызметі, ғылыми, әдеби мұрасы халқымыздың рухани қазынасына қайта қосылып отыр.

Ахмет Байтұрсыновтың ғылыми-творчестволық мұрасын негізінен үш үлкен салаға бөліп қарауға болады. Олар: автордың ағартушы, ғалым, тілтану, әдебиеттанудың алғашқы іргесін қалаушы ретіндегі еңбегі, ақындық және аудармашылық творчествосы.

Ахмет Байтұрсынов езінің саналы өмірін қазақ қоғамында білім-ғылымның жоғары бағаланып, ағартушылық бағыт әбден қалыптасқан кезде бастады. Ол ауыл мектептерінде, семинарияларда халықта білім беру, оны жетілдіру саласында көп ізденді, көптеген мақалалар, еңбектер жазды. «Әліп-би», «Тіл құралы», «Әдебиет танытқыш» атты кітаптар, қазақ тілін табиғаты, өзгешеліктері, араб алфавитінің жайы, терминдер, қазақ тілін оқытуудың методикасы туралы көптеген мақалалар жазуы, 1926 жылды Бакуда болған тюркологтардың Бүкілодактық I съезіне қатысуы (Қазақстаннан Ахмет Байтұрсынов, Елдес Омаров, Азиз Байсайтов, Білал Сүлеев, Нәзір Төрекұлов делегат болыш қатысқан. Ахмет осы съезд президиумына және бірнеше комиссия құрамына сайланған), Қазақстанның оку-ағарту комиссариатындағы жұмысы — осының бәрі

оның қоғамдық, мәдени, ағартушылық, ғалымдық қызметінің қомақтылығын аңғартады.

Белгілі совет түркологы академик А. Н. Кононовтың А. Байтұрсыновты көрнекті түркологтардың қатарында еске алған, оның қазақ алфавитін жүйелеу, оку құралдарын жасау фонетика мен грамматика саласындағы қазақ мәдениеті мен әдебиеті туралы зерттеулерінің маңызы туралы жазуы да текten-тек емес.

' И Эдебиеттану ісіне Ахмет Байтұрсыновтың қосқан үлесі аса мол. Қазақ тілі мен көркем сөзі, сана-салты, дүние танымы Ахмет Байтұрсыновты семинарияда оқып жүрген кезінен бастап қатты қызықтырғанға үқсайды, өйткені ол Орынбордағы мұғалімдер дайындастын семинарияны бітірген 1895 жылдын өзінде «Тургайская газетайың» 39-санында «Казахские приметы и пословицы» деген мақала жариялаған. Бұл оның баспа бетін көрген алғашқы еңбегі. Оның үстіне макаланың осы газет бетіне басылуының өзі көніл аударарлық нәрсе.\*"

Бұл жерде айтпағымыз — саналы өмірін қоғамдық, ағартушылық қызметке іштей дайындалып бастаған Ахмет Байтұрсыновтың халықтық көркем мұраның мән-маңызына, эстетикалық қадір-қасиеттеріне бойлап, оны жинап-бастыруға ұмытылысын байкату. Ол өзі де шығармалар жазып, баскә халықтар қазынасының үлгілерін тұған халқына жеткізу мақсатында аудармалар жасады. Көп ұзамай «Қырық мысал», «Маса» жарияланды. "Осы жылдары Ахмет Байтұрсынов әдебиет тарихын зерттеумен шұғылданды. Оның «Қазақ» газетінің 1913 жылғы уш санында шықдан «Қазақтың бас ақыны» деген көлемді мақаласы әдебиеттану саласындағы алғашқы зерттеуі еді. Оңда казақ халқының рухани өмірінде Абайдың аса ірі тұлға екені, өміrbаяны, шығармаларының мазмұн терендігі мен ақындық шеберлігі, поэтикасы, орыс әдебиеттерімен байланысы туралы ойлы пікірлер айтылған, ақын мұрасының эстетикалық қадір-қасиеттері ашылған. Осы мақалада Абайдың елендерінің тексті келтіріліп, ақынның поэзияға деген көзқарасы, эстетикасы, поэзияның адам өміріндегі ролі байсалды талданған. Мақалада айтылған пікір-тұжырымдардың, негізделген концепцияның бірсыптырасы кейін ғылым тарапынан қолдау тауып, бұл жүйедегі зерттеулерде дәлелденіліп, орнығып, жалғасымын тапты.

Кейінгі қоғамдық және басшылық қызметтер атқарған кездерінде де Ахмет ғылым саласындағы жұмыстарын тоқтатпаған, ол 1923 жылы Москвада қазақтың эпостық жыры «Ер Сайынды» алғы сезбен, ғылыми түсініктемелермен бастырып шығарған.

Ахмет Байтұрсынов бастырған «Ер Сайын», негізінен, ел қорғаушы батырлардың жорықтарын, ерлігін баяндайтын белгілі эпостық жыр нұсқасы. Ел арасында көбіне ауызша айтылып, сақталып келген көлемді, шамасы 3000 тармақ, тілі шұрайлы осы жырды 1870 жылы В.Радлов «Солтүстік түрік текстес халықтардың ауыз әдебиет үлгілері» жинағына енгізгені белгілі. Орынбор архив комиссиясының ғылыми енбектерінде бұл жыр «Бозманай» деген атпен басылған, 1922 жылы Ташкентте жарық көрген. Ал Ахмет Байтұрсынов «Ер Сайын» жырын Москвада бастырып,

астана басылымы аркылы еліміздің басқа да халықтарының назарына ұсынды. «Ер Сайыш» жырының баспа бетін көрген және Қазақ ССР Ғылым академиясының Орталық ғылыми кітапханасының қолжазба қорында сақтаулы нұсқаларын салыстыра зерттеу негізінде Ахмет Байтұрсынов нұсқасының идеялық-көркемдік деңгейін, мән-мазмұнын анықтау да алдағы күндердің міндеті болмақ.

1926 жылы осы баспа аркылы Ахмет «Жоқтау» деп аталатын жинақ жариялаған. Қайнылы уақыттарға байланысты шыққан жоқтау жырлар қазақ халқының бай ауыз әдебиетінде молынан сақталғанмен, оларды арнайы жүйелеп, сұрыптаپ, оның қогамдық мәнін айқындау бұрын қолға алынбаған іс еді. Ахмет жинағы осыған бастама болды. Бұл жинаққа енген «23 жоқтауда» халық басынан кешкен маңызды уақыттар, елдің ер жүрек батырлары, көпшілік үміт арткан адамдары, басшылары туралы айтылған. Олардың ішінде қаз дауысты Қазыбекті жоқтау, Абылай хан дүниеден өткенде айтылған жоқтау, баска да құнды туындылар бар. Мұның бәрі А. Байтұрсыновтың халықтық көркем сөз қорын жинаушы, зерттеуші, бастаушы ретіндегі зор еңбегін байқатады.

Қазақ филологиясының әдебиеттану саласында А. Байтұрсыновтың «Әдебиет танытқыш» (1926) атты кітабының ерекше маңызы бар. Бұл әдебиеттің тарихы мен теориясы туралы қазақ тіліндегі тұнғыш көлемді де салмақты еңбек. Ол бірнеше жылдар бойы оку құралы ретінде пайдаланылған. «Әдебиет танытқыш» деген атының өзі әйгілеп түрғандай, кітап әдебиет әлемін, көркем сөз табиғатын, сырыш, мазмұнын, ерекшеліктерін, жанрларын, дүниетаным мен қоғамдағы ролін қыруар мысалдармен дәлелдеп, байсалды, ғылыми түрде түсіндіруге арналған алғашқы тәжірибе, тұнғыш зерттеу болуымен құнды.

Қазіргі филология деңгейінен қарағанда кездесетін көптеген олқылықтары мен дәлсіздіктеріне, кейбір қателіктеріне қарамастан кітаптың жазылу принциптері, пікір-тұжырымдары, материалдарды классификациялауы, терминдері көніл аударапты.

«Әдебиет танытқынта» ең алдымен сөз өнерінің табиғаты, енердің баска түрлерінен — архитектура, скульптура, живопись, музыка, т. б.— ез-гешелігі, айырмашылығы, артықшылығы сөз етіледі. Өнер түрлерін талдай келіп, А. Байтұрсынов: «Әнердің ең алды сөз өнері деп саналады. «Әнер алды — қызыл тіл» деген қазақ мақалы бар. Мұны қазақ сөз баққан, сөз қүйттеген халық больш, сөз қадірін білгендейктен айтқан. Алдыңғы өнердің берінің де қызметін шама қадырынша сөз өнері атқара алады. Қандай\* сәулетті сарайлар болсын, қандай сымбатты я кескінді суреттер болсын, қандай әдемі ән-күй болсын, сөзбен сөйлеп, суреттеп көрсетуге, танытуға болады. Бұл езге өнердің қолынан келмейді» — деп жазады. Сөзбен сымбаттаудың я кескіндеудің үлгісін көрсету үшін автор Абай өлеңдерінен мысалдар келтіреді. «Әдебиет танытқышта ауыз әдебиетінің ең шурайлы, ең бейнелі, мазмұны мен көркемдігі бай үлгілерін пайдаланған. А. Байтұрсынов ауыз әдебиеті материалдарын іріктең, сұрыптап ғылыми-теориялық кітапқа пайдалануда белгілі бір жүйе, принцип ұстағаны байкалды. Ағартушы, езі айтқанында, «адамдық насиҳатшысы» ретінде қазақ

халқының көркем ойлау жүйесіндегі рухани қадір-қасиеттерге, жақсылық пен жамандық тартыстарына, ерлік пен батырлық істерге, бірлік пен ынтымак, сұлулық сырларын бейнелеген ұлғілерге көбірек көңіл болғен.

Көркем сөздің әр компоненттерін сез еткенде «Кобыланды батыр», «Ер Тарғын», «Ер Сайын», .«Алпамыс» жырларынан даналық, шешендік, тапқырлық сөздер қазынасынан, айтystардан, ертегілерден ойын дәл жеткізу үшін мысалдар, деректер келтіреді.

Қазак жырауларының мұрасын А. Байтұрсыновтың еркін де терең білетіні осы еңбегінде айқын көрінеді. Қазақ сөз өнерінің көне дәуірдегі улғілері, XV-XVII ғасырлардағы жыраулар шығармалары біраз уақыт еленбей, ескерілмей келгені мәлім. Ал А. Байтұрсыновтың ізденіс назарында солардың бірсынырасы болған. Оның еңбегінде Асан Қайғы, Нысанбай жырау, Бұдабай ақын, Наурызбай би, Құбыла ақын, Жарылғасын ақын, Алтыбас, Ақмолда, Әбубекір, Шортанбай, Байтоқ, Сүгір ақын, Мұрат, Досқожа, Орынбай, Шернияз т. б. ақын-жыраулар шығармаларынан үзінділер бар. «Әдебиет танытқышта» аты аталып, шығармаларынан үзінді келтірілген кейбір жырау-акындар әдебиеттануда әлі беймәлім, демек, ондай есімдерді іздестіру керек. А. Байтұрсыновтың ең биік үлгі ететіні — Абай Құнанбаев, Ыбырай Алтынсарин, Сұлтанмахмұт Торайғыров туындылары. Шоқан Уәлиханов пікірлері де жоғары бағаланып, орынды пайдаланылады, ол Шоқан туралы Потанин, Ядринцевтің естелік жазбаларына сүйенеді. Жыр-поэма мысалдары ретінде зерттеуші Абайдың «Ескендерін», Мұхамеджан Сералиннің «Топ жарғанын» Шәкәрімнің «Жолсыз жазасын», «Қалқаман — Мамырын», Мағжанның «Батыр Бајын», «Корқытын», «Орман патшасын» атайды.

А. Байтұрсынов өз кезіндегі әдебиет өкілдерінің шығармаларына көңіл аударып, мысалдар келтіреді, кейбір шығармаларының аз да болса жанрлық сипаттарын анықтап, өз пікірлерін айтқан; Мысалы, А. Байтұрсынов: «...Мұхтардың (Әуезов) «Оқыған азамат», Смағұлдың (Садуақасов) «Калайша кооперация ашылды» деген әңгімелері ұсақ әңгіменден гөрі ұзак әңгіме түріне жақын болады. Нағыз ұсақ әңгіме болатындар: Смағұлдың «Автономиясы», Мержақыптың (Дулатов) «Қызыл қашары», Бейімбеттің (Майлин) «Айт күні» сияқты әңгімелер» — деп жазды.

«Әдебиет танытқыш» еңбегінде А. Байтұрсынов ауыз және жазба әдебиеттің әлеуметтік, қоғамдық мән-манзызын ашудан гөрі адамгершілік, эстетикалық, әсемдік әуенін талдауға бейімділік танытады. Ол жазба әдебиеттегі ағымдар, әдістер туралы да ой-түйіндер айтута тырысқан. Бұл ретте кітаптың «Сындар дәуірі, ондағы шығарма түрлері» атты тарауы маңызды. Одан сыншыл реализм туралы алғашқы пікірлер нышанын кездестіруге болады. Қазақ әдебиетінің даму жолдарын сөз ете отырып, зерттеуші «Европа жұртының сындар әдебиетін» еске алады да,.оның бай тәжірибесін менгеруге бет алушылық қазақ көркем сөз ізденістерінде сәйкестік, үйлесімдікке жалғасқанын айтады. Әдебиеттер тоғысуы мәселелерін қозғайды.

Сөйтіп, А. Байтұрсышов зерттеуші ретінде қазақ әдебиетінің дамуы процесін жеке дара бөліп қарамай, барлық халықтар әдебиетіне ортақ сипаттармен ұштастыра талдауға тырысады, өнерпаз елдер әдебиетіне тән көркем сөз түрлерінің қазақ әдебиетінде де бар екенін, кейбірі сол кезде жоқ болса, туа бастағанын, келешекте дамитынын айтады.

А. Байтұрсынов — қазақ музыкасы мен ән-күй өнеріне де терең ой жіберген ғалым. А. В. Затаевичтің айтуынша, ол шебер домбырашы, әрі әнші болған. «Қазақ халқының 1000 әні» атты еңбегінде А. В. Затаевич былай деп жазады: «А. Байтұрсынов өз халқының әндерін жақсы біледі және оларды тамаша орындайды, ол — жақсы домбырашы. Қазақ халқының тарихын, этнографиясын, тұрмысы мен әдет-ғұрыптарын терең білетіндіктен, А. Байтұрсынов Торғай, Ақтөбе, Бекей ордасы, Қарқаралы өлкесінің әндерін жазғанда маған көп жәрдемдесті тамаша екі күйді, тіпті өзі орындағы». \.

ІҚазақ халқының мәдениеті, оның тарихы, қалпы, келешегі туралы толғаныстар А. Байтұрсынов еңбектерінде көп ұшырайды. Бірсыныра жыл қатар өмір сүріп қызмет еткен жазушы М. О. Әуезов бір мақаласында А. Байтұрсынов 1923 жылы «Мәдениет тарихы» атты кітаптың қолжазбасын тәмәмдаған турагы да хабарлаған. Бірақ ол қолжазбаның тағдыры әлі күнге белгісіз. \.

Ахмет Байтұрсынов омірі мен қызметінің тағы бір салмақты саласы — оның ақындық, аудармашылық еңбегі. Ол бала кезінен қазақ ішінде коркем сөз құдіреті жоғары саналатынын көріп, естіп, сезініп, ойланып ескенге үқсайды. Саналы өмірге аяқ басқаи кезде халық поэзиясы мен Абай Құнанбаев, Үбірай Алтынсарин шығармаларын, орыс әдебиетін оқиды. Мұның бәрі қоғамдық ой-пікірде тынымсыз іздентен, өмірге құштар жас Ахмет үшін текке кетуі мүмкін емес еді. Сондықтан ол айналаны тану, білу, сезіну қалпын поэзия тілімен, өлеңмен жеткізуға ден қояды. Өлеңді өзінің ағартушылық идеясына пайдалануды көздейді. Ахмет:

Бұл сөзді біреу алмас, біреу алар,  
Құлағын біреу салмас, біреу салар.  
Теп-тегіс көпке ұнау онай емес,  
Кейіне жарамаса, кейіне жарап.

Қайсысы ықыласын салып тындал,  
Жаратпай қайсыбірі теріс қарап.  
Дүниеде сүйгенім бар, күйгенім бар,  
Солардан аз да болса белгі қалар,— дейді.

Ақынның өлеңдер топтамясы «Мяса» давеи атпен Орынборда 1911 жылы басылған. Жинаққа қойған атына ол едәуір ой, салмақты жұқ артқан деуге болады.

Ызындал, ұшқан мынау біздің маса,  
Сап-сары, аяқтары ұзын маса.  
Өзіне біткен түсі өзгерілмес,  
Дегенмен, кара яки қызыл маса.

Үстінде ұйықтағанның аинала ұшыш,  
Қаққы жеп қанаттары бұзылғанша.  
Ұйқысын аз да болса бөлмес пе екен,  
Коймастан құлағына ызындаса?

Осы жолдардан «ызындалап, ұшкан мынау біздің маса» — сергектікті, қозғалыс күйді, серпіліс пен ізденісті сәулелейтін астарлы бейне екені көрінеді. Ол «үстінде ұйықтағанның айнала ұшып», қоғамның енжар, жалқау, ұйқыдағы күйден оянуына қызмет етеді. Осы ағартушылық ойды ақын басқа да шығармаларында әрі қарай дамыта түседі.

«Масаның» негізгі идеялық қазығы — жұртшылықты оқуға, өнер-білімге, рухани көтерілуге шакыру, адамгершілікті, мәдениетті уағыздау, еңбек етуге үндеу. Ақын өлеңдері жалпы, сол кездегі ағартушылық бағытпен үндес. Ақын өз өлеңдерінде көбіне Шоқан, Абай, Үбырай қалыптастырыш дамытқан ерісті ойды, калыш алған дәстүрлерді, гуманистік әуендерді, демократтық бағыттарды жаңа жағдайда. Әзінше жалғастыруыш ретінде көрінеді. Оның өлеңдерінің тақырып қойылсынан, өрнектелуінен, ой жүйелеу мәнерлерінен Абай, Үбырай үлгілеріне жақындық, үйлесімдік, үндестік байқалады. Солар сияқты А. Байтұрсынов та айнала қоршаған ортаға ойланған, сын көзімен қарайды, қоғам қалпына көңілі толмайды. «Қазақ салты», «Қазақ қалпы», «Досыма хат», «Жиған-терген», «Тілек батам», «Жауға түскен жан сөзі», «Бак» сияқты өлеңдердің мазмұны осыны танытады.

Алдыңғы ағалар суреттеп кеткен қазақ қоғамының жалпы қалпында дәл сол кезде айтарлықтай өзгерістер жоқ-ты. Ахмет қоғамының сол бір келенсіз көріністеріне салқын қарай алмайды. Ол жан ауыртып, жүрек сыздатар «қасірет сөзін» айттып, хатқа жазады.

«Қазақ қалпы», «Досыма хат» өлеңдерінде қазақ елінің қалпы «Қалтылдақ қайық мініп еспесі жоқ, теңізде жүрміз қалқып көшгіесі жоқ», «Шығармай бір женін қол, бір жерден сөз, алалық алты бакан дертпен кірдік», — «Ақшаға абыройын, арын сатып, азған жүрт, адамшылық қалмай сыны», «Жаны мал, жақыны мал, малдың құлы» деген сипаттармен нақтылана туседі.

А. Байтұрсыновтың «Жиған-терген»-длені Абайдың «Сегіз аяғы» үлгісімен, әсерімен жазылған шығарма. Осы өлеңде қазақ қоғамының бірсыптыра көкейтесті мәселелері көтерілген. Елді, ел намысын ойлайтындар аздығы, бірліктің жоқтығы, ел басшыларының зорлықшылығы, т. б. жайлар туралы ой-тұжырым айттылған. Қоғам қалпы туралы ойланған ақын:

Эр жолды ойлап,  
Ойыма бойлап,  
Ұқтым тайыз, теренді.  
Сайраған тілмен,  
Зарлаған үнмен,  
Құлағы жоқ керенді —  
Ұқтыра алмай сөз әуре,  
Тек тұра алмай біз әуре,—

дейді де, сөз ұғар, көніл көзі сергек қауым алдына нелер келенсіз көріністер сырын ашады. Ұлы ұстазы Абайша ол «Салынып дауға, сатылып жауға» аянған болыстықты, аңқау адамдарды алдап, мал жинап, кәсіп етіп жүрген арамза моллаларды, халық бойындағы енжарлық, бейқамдық мінездерді сынға алады. «Үйқышып жүртты, тұксиген мұртты, обыр обып, сорып тұр» — «Тұн етіп күнін ояткыізбай қорып тұр» — ақын ойынша мұндай озырлық, ұстемдік ету үшін жүргізіліп отырған саясатың нәтижесі. Соның бәрін көріп толғанған ақын:

Үләйшіп қайғы,  
Уытын жайды,  
Айтпасыма болмады.  
Қабағын түйіп,  
Қанағын жиып,  
\\  
Көкті бұлт торлады.  
Жаңыр жаумай, жауса қар,  
Жұрт жұтайтын түрі бар,—

деген ойлы тұжырым жасайды.

А. Байтұрсынов қазақ аулындағы әлеуметтік теңсіздіктің, таптық шиеленіс-қақтығыстардың себеп-салдарына терен бойлай алмаса да, еңбекші халыққа, олардың ауыр халіне көніл бөліп, аяушылық сезім білдіреді, ауыр халге төзіп, көніп, үндеңей жүре бермей, адамдық қасиетті қорғауды қалайды, Бұл оның демократтық, гуманистік көзқарастарға бейімдігін анғартады. «Адамдық диқаншысы» деген өлеңінде ол өмір бойы бейнетке, қорлыққа үндеңей шыдал, жасып, жаншылып кеткен адамдарды көріп, жаны ашиды, олар сергектеу болса, адамдыққа ұмтылса, үндеңей жүре бермесе, алдағандарға алданбаса, таяққа еті үйреніп жүнжіп кетпес еді деп ойлайды, олардың намысына тиерлік ашы сөздер айтады.

Елдің ауыр халін аз да болса женілдету жолдары туралы ойланғанда Ахмет бұрын қалыптасып дамыған ағартушылықтың мақсат-мұраты арнасында ой өрбітеді, үйқыдан оянып, білім-ғылымға ұмтылу қажеттігін, оянған ерге еру керектігін еске салады. Оның:

Оянған ерге  
ұмтылған жерде  
Еруші азда, серік кем.  
Қас білген досты,  
Дос білген қасты,  
Мұндай елді көріп пе ең?  
Қыс ішінде бірер қаз  
Келгенменен, қайда жаз?! —

деген өлең жолдары ел ішіндегі азын-аулақ зиялды азаматтар сөзіне құлақ қоюдың аздығына күйінуден туған, Ақын өлендерінің шығарылған жылдары нақты қойылмауы, әрине, оның творчестволық ой жүйесінің эволюциясын анықтауды қыннатады. Дегенмен, «Маса» өлендер жинағы 1911

жылы басылғанына сүйеніп, сонда жарияланған туындылар содан бұрынғы жылдары жазылғанын, Ахмет Байтұрсыновтың ел күйін өзгертудің ағартушылық жолдан басқа бір арнасын іздеп, сезіне бастағанын байқаймыз. Ол ізденіс 1905-1907 жылдар уақығаларыйа, революциялық дүмпүлерге, сол дүмпүлердің қазақ жерлерін де шарпуына байланысты қалыптаса бастаған деуге болады. Мысалы, «Бак» деген өлеңінде ақын:

Бұлтар басып жасырған,  
Жана түсіп басылған,  
Таң шапағы сөніп тұр;  
Жаңаланған өмірден  
Жаңа шынып көрінген  
Гүл қамауда семіп тұр,—

дейді. Мұндағы «жана түсіп басылған», «таң шапағы», «жаңа шынып көрінген, гүл қамауда семіп тұр» — деген көркемдік компоненттер, символдық бейнелер замана бағытына жаңа ғасыр көгіндегі көрініс-құбылыстар әкелген бағыт-бағдар әсерлерінен туғаны байқалады. Ағартушылық баққа жетудің қындығын ол тез түсінеді. Алайда, ақын түнілген емес, ізденуден, үміттенуден, ұмтылудан жалықпайды:

Үміт сүйрер жыракқа,  
Жетесің деп мұраткә,  
Талықсам да ізденіп,  
Қашан көңіл жасарар?  
Арқа басың босанар  
Рахатлы жаз келіп?  
Қашан жанып шам-шырак,  
Сәуле беріп жаркырап,  
Болар жарық төрт тарарап?  
Қашан маған іздеген  
Күліп жылы жүзбенен  
Болар серік бақ қарап? —

деп армандаиды ол. Бұл тамаша өрнектер тек бір ақынның жан-күйі ғана емес, Октябрь алдындағы қазақ қоғамының рухани ізденістерінің белгісі, алда жанар шам-шыракты армандалап күту, аңсау әрі сену сарыны. Мұның негізінде қазақ қоғамының тынымсыз рухани ізденістері, мұддесі, кейінгі революциялық толқындарға, өзгерістерге жылдам ілесуіне себеп болған таза оптимизмі жатыр.

«Маса» жинағының көркемдік арсеналында талай эпитеттер, теңеулер, шенdestірулер, инверсиялар, мақал-мэтелдер бар. Мысалы, теңсіз"Дж;~оу-<sup>бырлық</sup>, әділетсіздік, әрекетсіздік, надандық жайғасқан жайды ақын, көбіне «тұн», «тұнерген тебемізден бұлт арылмай», «қасірет», «өртке душар болып», «не қалды тәнімізде шарпылмаған», «алалық алты бақан дерпен кірдік» деп бейнелейді. Айтайын деген ойын ақын көркемдеп жеткізуге, бейнелі сөз табуға шебер. «Достыма хат» өлеңі •тутелімен осындаған бейнелі сөздерден, теңеумен шенdestіруден, антитеза мен синек-доходан тұрады:

Қырағы қия жазбас, сұнқарым-ай!  
Қажымас қашық жолға, тұлпарым-ай/  
Үйілген өлексені өрге сүйреп,  
Шығармақ қыр басына, іңкәрім-ай!

J Жарқырап жақсылықтың таңы атпай тұр,  
Тунерген төбемізден бұлт арылмай.  
Көк атты, көн терілі, көніп қалған,  
Сықса да шыдай беру — жұрт жарылмай.

Бұл жолдарда қазақтың көркемдік ой жүйесінде қалыптасқан өрнектер ақынның өзіндік ізденістерімен астаса қилюласқан. Айталық, «қырағы қия жазбас сұнқарым-ай, қажымас қашық жолға тұлпарым-ай» деген метафоралық врнектер бұрыннан көркемдік арсеналда бар болса «өлгін өлексенің өрге сүйреп, шығармақ қыр басына іңкәрім-ай» ақын өзі тапқан көркемдік тіркес, айтылмыш ойды удете, үстемелей жеткізу қызметін аткарып тұр. Бұл синекдоха «сұнқарға, тұлпарға» балап отырған тамаша ер тұлғасының қадір-қасиеттерінің ықпалы күштілігін, елін өрге сүйреп, қыр басына, биікке шығару жүгі ауырлығын, салмақтылығын айту үшін қолданылған.

Кім біліп,-ер еңбегін сезіп жатыр?  
Кім шыдалп, жолдастыққа төзіп жатыр?  
Сасық ми, салқын жүрек, санасыздар  
Алансыз ақ малтасын езіп жатыр,—

дегендегі, «кім шыдалп, жолдастыққа төзіп жатыр» деу де автордың көркемдік ой жүйесінің өзгешеліктерінің бір қыры. Әдетте жолдастық сөзі жиі қолданылғанмен, оның адам қарым-қатынасындағы терең мағынасы-мәні ауыр сыннан өту, шыдау, тезу арқылы шындалатыны, нағыз жолдастық әр адамның қолынан келе бермейтіні, биік рухани өріске, асыл арманға байланыстылығы ашыла түскен:

Y Тықылдалп, күр пысықсып сөйлейтін көп,  
// "Екпіндеп, ұшкыр атша қарқындаған.  
Бос белбеу, босаң туған бозбала көп  
Киіздей, шала басып, қарпылмаған...

«Сасық ми, салқын жүрек, санасыздар, алансыз ақ малтасын езіп жатыр» — аңы сөздер, көңілінде сәл саңдау бар адамды айналаға, өзіне сын көзben қараута, намыс туралы ойлануына елең еткізбей қалмайтын салмақты тіркестер.

Корыта айтқанда, Ахмет Байтұрсыновтың өлеңдер топтамасы — кеп ғасырғы қазақ поэзиясының дәстүрлерін, демократтық-ағартушылық әдебиет үлгілерін жаңа тарихи жағдайда дамытЫп, жалғастырған идеялық-көркемдік деңгейі жоғары туындылар. Оларды кайта бастыру туған әдебиетіміздің жалпы адамзаттық, гуманистік, демократтық, тәрбиелік сипаттарын айқындалп аша түсетін мұра болмак.

Ахмет Байтұрсынов қалдырған бай мұраның тағы бір саласы оның көркем аударма дамуына үлесі. Қазақ әдебиетіндегі көркем аударма тарихы бай екендейтін мәлім. Ахмет Байтұрсынов аудармамен шұғылданған тұста, яғни XX ғасырдың бас кезінде аудармада, әсіресе, орыстың классикалық әдебиеті үлгілерін казақ тіліне аудару ісінде едәуір тәжірибе жинақталған еді. Сонау Абай мен Үбірай тәжірибелерінен басталған бұл иті дәстүр Ақылбай мен Мағауия Құнанбаевтар, Шәкәрім Құдайбердиев, Мұхамеджан Сералин, Бекет Өтетілеуов, Ғұмар Қарашев аудармаларымен, газет-журналдардағы тәржімалармен толыға түскен. Енді бір топ ақын-жазушылар Ахмет Байтұрсынов, Жұсіпбек Аймауытов, Мағжан Жұмабаев, Мержақып Дулатов көркем аударма ауқымын кеңейтіп, Шығыс пен Батыс елдері әдебиеттері үлгілерін, орыс классиктерінің шығармаларын қазақ тіліне аударып, көркем қазынаның бұл саласын байытуға қызмет етті.

Ахмет Байтұрсынов алғаш рет аударма жинақ бастыру ісін бастаушы болды. Ол орыстың классик жазушысы И. А. Крылов мысалдарының бір тобын қазақ тіліне аударып, «Қырық мысал» деген атпен Петербургте 1909 жылы жеке кітап етіп бастырды. Бұл И. А. Крылов шығармаларының қазақ тілінде, тіпті Орта Азияда десе де артық емес, тұңғыш жеке кітап болып бастырылуы.

И. А. Крылов мысалдарының СССР халықтар тіліне аударылуының өзіндік тарихы жазылар болса, оның өштес туындыларының біразын ең алғаш өз тілдерінде сөйletken халықтардың алдыңғы қатарында қазақ халқы, оның ардагер ұлдары Үбірай Алтынсарин мен Абай Құнанбаев тұрары хақ. Олардан кейінгі бір топ қазақ ақын-жазушылары да Крылов туындыларын қазақ тіліне аударумен шұғылданды. Солардың бірі — Ахмет Байтұрсынов.

Ахмет Байтұрсынов «Қырық мысал» жинағына жазған «Замандастарыма» деген кіріспесінде аударманың мән-мақсаты, дәүір дүбіріне ілесу ниеті, қындық жагдайларда орындағаны туралы айтады:

Орыстың тәржіме еттім мысалдарын,  
Әзірге қолдан келген осы барым.  
Қанағат азға деген, жоққа — сабыр,  
Комсынып қоңырайма, құрбыларым!

Бабы жоқ жұмыстағы мен бір арық,  
Күй қайда үздік шығар топты жарып.  
Ат тұрмас аяғында желі болса,  
Дүсірлеп шапса біреу қику салып.

Бар болса соңдай жүйрік қызар деймін,  
Естілсе құлағына дүбір барып.  
Әйтпесе арық шауып ондырар ма,  
Жүргенде қамыт басып, қажып-талып.

«Қырық мысал» жинағында қырық бір мысалдың да аудармасы бар.

И. А. Крыловтан қырык мысал және орыс әдебиетінде мысал жанрын қалыптастырушылардың (А. П. Сумароков, В. И. Майковпен бірге) бірі И. И. Хемницердің «Ат пен есек» шығармасы қазақшаға аударылған. Онда көтерілетін мәселелердің, айтылатын ойлардың салмақтылығына, қазақ оқушыларына жақын да түсінікті болуына қазақ ақыны қатты көңіл болған. Соңдықтан ол төл шығармадай оқылады.

Ахмет Байтұрсынов бұлардан басқа А. С. Пушкиннің «Балықшы мен балық», «Алтын этеш», «Ат», «Данышпан Аликтің ажалы» атты шығармаларын, Надсонның бір өлеңін қазақшаға аударған. Оның Крылов, Пушкин, Лермонтов сияқты классик ақындар творчествосымен қатар, орыстың белгілі лирик ақыны Семен Яковлевич Надсон (1862—1887) шығармаларына коңіл аударуы да тегін емес болса керек. Кезінде Надсон өлеңдерін Шәкәрім де аударған. Қазақ ақындары Надсонның Петербургта эр кезде жарық көрген шығармаларымен (2 томдық жинағы тек 1917 жылы шықты) таныс болғанда, оларға орыс ақынының туындылары қатты ұнаған сияқты. Көп жағдайда олар өз ой-толқындарымен, ізденістерімен, көңіл-күй сезім дүниелерімен үйлесімдік, сәйкестік, ұқсастық тапқан деуге болады. Надсонның таланттылығы, сүйкімді бейнесі, аянышты өмірі, не-бәрі 25 жыл ғана ғұмырында соншалықты маңызды да қомақты мұра қалдыруы, онда адам өмірінің сан алуан күй-сырлары шеберлікпен шертілуі, қоғамға өзіндік қатынасының айқындығы, философиялық ой-толғаныстары, қадір-қасиеттері зерделі жастарды қызықтырғанға, еліктірғенге ұқсайды. Бұл да ол кезде бір топ қазақ ақындары томаға тұйықтықтан аулақ болып, көршілес елдерде не иті жақсылық болса, соған көңіл аударып, оларды өз халқының қажетіне жарату үшін рухани ізденістерде болғанын байқатады.

Ахмет Байтұрсыновтың саналы өмірінде араласкан, қызметтес, пікірлес, бағыттас болған адамдары көп. Оларды анықтап, нақты деректер негізінде зерттеу қажет шығар. Солардың ішінде А. Е. Алекторов, Г. Н. Потанин, т. б. орыс зиялдылары бар.

«...1896 жылы Омбыда, Ақмола, Семей школдарын баскарыш тұрған Алекторовпен хабарласыт, Омбыға барған...» — деп жазды Мұхтар Әуезов. Омбыға барыш Алекторовпен көрісуі Ахандың кейінгі істері мен тіршілігіне эсер етуі де мумкін. А. Байтұрсынов Г. Н. Потаниннің туғанына 80 жыл толуына арнап өлең шығарғанда халық қазынасын жинау, зерттеу ісінің пайдалылығын атап өткен.

Ахмет Байтұрсыновтың қоғамдық-ғылыми творчестволық мұрасы кезінде қазақтың көптеген зиялдылары назарында болған. Ол туралы Сәкен Сейфуллин, Смағұл Садуақасов, Ғаббас Тоғжанов, Мұхтар Әуезов, Мережақып Дулатов, Елдес Омаров, Сәбит Мұқанов, Асафангел Крымский, Михаил Батталов, Митрофан Сильченко, Бейсембай Кенжебаев, тағы басқалар жылы лебіздер айтқан.

Ахмет Байтұрсыновтың өмірі мен қызметі туралы алғашқы басылған мақалалардың бірі оның РКП(б)-ның Орынборлық комитетіне мүшелікке алу туралы өтінішіне («Известия», 1920 жылы 16 апрель) байланысты жазылды.

1920 жылы 4 октябре Орынборда Қазақ өлкесі Советтерінің Құрылтай съезінде Қазақ АССР-і құрылып, Орынбор 1920-1922 жылдары оның астанасы болғаны, қазақ интеллигентиясының едәуір бөлегі сонда шоғырланғаны белгілі. Олар Орынборда сол кезде үйымдастырылған «Қырғыз (Қазақ) өлкесін зерттеу қоғамының» жұмысына да белсене қатысқан. Ахмет Байтұрсынов осы қоғамның күрметті мүшесі әрі басқарушысы болған. Осы қоғамның мүшелері қатарында одан басқа Жолдыбаев Молдағали, Дулатов Мержақып, Затаевич А. В., Баталов Михаил Павлович, Қаратаев Қайролла, Құлжанова Нәзипа, Сейфуллин Сәкен Омаров Елдес, т. б. жұмыс істеген. Осы қоғам бірнеше жыл бойы Орынборда «Труды общества изучения киргизского края» деген жинақты орыс тілінде шығарып тұрған. Бұл басылымда қазақ елінің экономикалық, саяси, рухани, мәдени және әдеби өмірін жан-жақты қамтитын мақалалар көп. Оларды жинақтап, жүйелеу, зерттеу де қажет. Онда Ахмет Байтұрсыновтың 50 жасқа толуына арналған мақалалар жарияланған. Оның бірі М. Дулатовтың «Ахмет Байтұрсынович Байтұрсынов» (Биографический очерк), екіншісі Е. Омаровтың «Ученая деятельность А. Б. Байтұрсынова» макаласы. Мақалаларда өмірбаяндық деректер, ғылыми, әдеби пікір-тұжырымдар бар. Атап айтқанда, оларда Ахмет творчествосы — акын, аудармашы, журналист, кітап бастырушы, тілші, әдебиетші есебінде зор баға ие болған.

Ахмет Байтұрсыновтың 50 жасқа толуына Сәкен Сейфуллин де, Мұхтар Әуезов те мақала арнағаны жоғарыда айтылды. Оларда Ахмет Байтұрсыновтың өмірі мен қызметіне жан-жақты баға берілді. «Айналып келіп таразыға тартылған, сыннан өткен деп Ахандың ғана ардақты атын айтамыз. Одан баска жалпақ елдің сынына толып, мейірін қандырған кісілері санаулы.

Ахаң ашқан қазақ мектебі, Ахаң тұрлекен ана тілі, Ахандың салған әдебиеттегі орны — «Қырық мысал», «Маса», «Қазақ» газетінің 1916 жылдары қан жылаған қазақ баласына істеген еңбегі, өнер-білім, саясат жолындағы қажымаған қайраты — біз ұмытсак та, тарих ұмытпайтын істер болатын.

Оны жүрттың бәрі де біледі. Бұның шындығына ешкім де дауласпайды.

Сондықтан 50 жылдық тойын істеп отырған қуанышты күнде Ахаңа біздің айтатын сөзіміз: Ахаң еңбегі жанған жанның бірі. Истеген ісінің жемісі — артынан келе жатқан жастар. Оның арты Ахаң мектебіне тізіліп, кіріп жатқан жас буын, жаңа өсіп келе жатқан қазақ әдебиеті Аханды өзінің басшысы деп санайды.

Каламынан тамған бал ем болудан айнымайды. Әлде болса, өмірінің ұзақ болып, еңбегінің өнімді болуын тілеуден қазақ баласы қайтпайды»,— деп жазды М. Әуезов.

А. Байтұрсынов туралы Смағұл Садуақасов, Ғаббас Тоғжанов мақалалар жариялады. А. Байтұрсыновтың 1929-1934 жылдары жер аударылғаны жоғарыда айтылды. Сол бір қын кездердің өзінде ол туралы

лебіздер айтқан адамның бірі жазушы және ғалым Сәбит Мұқанов еді. Ол 1932 жылы шыққан «XX ғасырдың бас кезіндегі қазақ әдебиеті» деген көлемді еңбегінде бірсыншыра ірі тұлғалар қатарында Ахмет Байтұрсыновты атады. Оның еңбектеріне талдау жасады. М. Баталов пен М. Сильченко «Очерки по казахскому фольклору и казахской литературе» деп аталып, 1933 жылы шыққан кітапшасының көптеген бетін Ахмет Байтұрсыновқа арнады. Сол тұстағы «алашордашылар» позициясын сынауға құрылғанмен, бұл екі еңбектің де Ахмет Байтұрсыновтың қоғамдық, ғалымдық, әдебиетшілік қызметінің негізгі бағыты мен көркемдік құндылығын мойындағанда өте алмағаны байқалады. Соңғы кітапта: «Байтұрсынов — Орынбордағы қырғыз мұғалімдер семинариясында білім алған педагог. Қоғамдық-революциялық қызметін ол 1905 жылдан, қазақтың ұлтшылдық буржуазиялық-демократиялық интеллигенциясы революциялық үйрмелерде, әсіресе реакция жылдары астыртын жұмыс жүргізген кезде бастады. Байтұрсынов 1913 жылы «Қазақ» газетін бастырды, оның негізгі бағыты — қазақ халқының қоғамдық-мәдени оянуына ықпал ету болды. Газет 1918 жылға дейін шынып тұрды, жас ақын-жазушыларды біріктірді... Байтұрсыновтың сүйікті жанры — мысал. Грек мысалшысы Эзоп, француздық Лафонтен, орыс Крыловтың өткен замандардың қалдықтары мен керітартпалықтарын, өз табы ішіндегі басқа да топтардың кемшіліктерін сынау үшін мысалды құрал еткені сияқты, Байтұрсынов та бүйі, маса, тағы сол сияқты бейнелерде орыс патшасы чиновниктерінің зорлықтарына және феодализмнің қалдықтарына өз табы түрғысынан қарсы шығады.

Байтұрсыновтың өлеңдері «Маса» жинағында топталған. Байтұрсынов үшін әдебиет оның идеясын, саясатын іске асыру құралдарының бірі болды.»


Көп жылдар бойы А. Байтұрсынов атына тыйым салынған кезде жазылған сыңаржақ даттау пікірлерге тоқтау қажет емес шығар. А. Байтұрсыновтың бай мұрасы бүгін марксік-лениндік методология түрғысынан объективті, тиянақты, ғылыми зерттеу табатыны даусыз.

*Шәмшиябану СӘТБАЕВА,  
Казак ССР Ғылым Академиясының корреспондент-мүшесі.*

Бірінші болім

ӨЛЕНДЕР

(1911—1922)



آخىدد بایتۇرستۇنف.

# ماسا



3 نېھى باسېلىزۇرى.



قوسىنه قاراب،  
اچىينىن توڭلۇمە!  
گۈچىنه قاراب،  
اسىننىن توڭلۇمە!



ئىل. «ЗАТЛЯРСТАМ». ماتباغا اسى  
قازان. — 1922 ى. 1922 چىل.

А. Байтұрсыновтың 1922 жылы Қазанда шыққан «Маса» жинағының  
мұқабасы.